

畢節縣志

卷一

畢節縣志

貴州省圖書館複製

畢節縣志複製說明

畢節縣志，八卷，清乾隆二十三年知縣董朱英等修，路元升等纂，同年付梓。原書版框高六·五市寸，寬四·七市寸，現據本館所藏鈔本（一九六五年初據故宮博物院藏刻本傳鈔）複製。

複製時對鈔本中的部份錯別字及缺字，已據同治畢節縣志稿及光緒畢節縣志進行校正和補入，未能補入者，以「□」代之。凡經校改及補入之字，均載書末所附之「校勘記」中，以便讀者參

考。複製本如有不妥之處，歡迎讀者批評指正。
承故宮博物院協助鈔錄，謹此致謝。

貴州省圖書館

一九六五年十月

不可勝數今幸際昇平之世得賢而有才如董君者為之宰更值政通人和百廢具舉之候倘不及時修輯將所謂湮沒者終於湮沒亦奚以昭職守而垂法戒乎予老朽不獲執鞭從事思遙寄一言相促不意董君業已告竣不遠數千里示予也夫乃知向之疑其不暇與今之疑其不為總予私心揣度耳曾是董君之才而顧不能以公餘與都人士商榷成書也哉披讀再三洵見其經濟過人甚遠有非淺識可以窺及者若夫考訂之精詳增補

之確核足以信今傳後此固有目所共賞無煩縷
述予惟折服董君惓惓畢邑之苦衷為畢邑幸焉
爾

乾隆二十二年歲次彊圉赤奮若如月

賜進士出身

誥授資政大夫禮部左侍郎

予告在籍食俸年養弟 古吳沈德潛

重修畢節縣志序

邑之有志所以徵時事辨人物定疆里信今傳後
之書也畢節自奢香獻道以還芟夷榛莽先於省
會通滇通蜀實為要區是以元明之間寇盜充斥
干戈迭起斯民不勝其凋敝幸遇我

朝遷衛為縣輕徭薄斂仁義漸摩教養百十餘年之
久而後文物聲明彬彬稱盛洵乎畢之涵濡德澤
視內地為倍深而畢之詮述淵源亦較他志為倍
急也前令淳安方君取黔記中畢志一冊命羅明

經英與多士分纂發潛闡幽釐為二卷及南陵柯
君為宰偕張廣文鯤畧增舊稿數年後邵明經熙
載謂其猶有失實復加筆削補所未備惜未雕板
傳寫浸訛考之柯本久而漫滅噫畢志何不絕如
線若此甲戌冬余膺

簡命承乏茲土搜其遺草帝虎魯魚紛紛錯思與邑
人校訂郵書請同年沈歸愚先生來黔總裁其事
時先生以年高堅却余亦以兵刑賦稅局廠諸事
未易釐剔兼之黌宮漫漶書院傾圯苗夷頑梗皆

急需整理安有餘力講求今昔時事之盛衰人物
之顯晦以及疆里之變常乎於是舉其所宜先者
虛衷體察竭力經營勉勉循循行二年餘各俱畧
有端緒擬將舊本反覆深維補輯成帙適閩中馮
先生及江左家弟半壑後先過署余即請其互相
考訂延衆紳士彙集編纂功未及半而馮先生仙
逝惟家弟與紳士輩悉心搜討改其失誤疏其支
離正其矛盾並採年來應脩事實商酌詳明一一
增補仍賞至歸愚先生處求其裁定乃得繕寫磨

勘壽以棗梨倘生斯土者展卷之下恍然於太平
溫飽之有由而為子思孝為臣思忠無負

國家教養之深恩是余脩志者之所厚望也夫

乾隆二十三年歲次戊寅夏四月上浣

賜進士出身文林郎知畢節縣事內陞奉直大夫部員
外郎順天董朱英序

畢節縣志舊序

方瑞合

周禮大司徒掌九州輿圖紀其廣輪與山林川澤
丘陵墳衍原隰之名物職方氏辨五土百族九穀
六擾之要周知其利害即後世郡邑志之所由昉
乎夫國無史治亂興衰無由鏡家無乘世德源流
無由考若邑無志則錢穀戶口阨塞險要風俗人
物以及山川道里之遠近災祥時政之得失又奚
以洞悉無遺故考亭所至即以脩輯為急所重概
可知矣黔去京師萬里荒服也畢去黔復數百里

介古梁西南夷穴地不掌大人不數千疑無庸志
然一民尺地莫非臣土可曰彈丸黑子竟置弗錄
耶考舊志畢節始於前明洪武二十一年一時戍
守之官軍來自中州冠婚喪祭不類夷俗後二百
七十餘年間家絃戶誦合畢赤兩地捷南官者四
人登賢書者四十五人男子之盡忠盡孝女子之
為貞為烈往往不乏在名邦雖不足多而邊陲荒
裔殊可稱善也

本朝順治十八年入版圖康熙二十六年建縣余於

改設之三年來令茲土初入境見山田荒蕪民凋
物敝披簿書則里甲混雜行釋菜則瞻拜無地問
志籍則兵火無存即欲效考亭脩輯未遑也今承
乏三載鴻雁漸歸疆界漸楚石田漸熟學校義館
亦稍稍脩築倘邑志仍聽缺畧奚以繼前徵而啟
後美乎爰搜遺編斷碣得十之七讀郭青螺先生
通志得十之三命邑人羅英屬稿裁定上下二卷
曰輿地曰建設曰民物為考者三為目二十有五
曰官師曰科貢為表者二為目一十有五曰名宦

曰人物為傳者二為目一十有二曰雜記為目六
曰藝文為目九凡萬有餘言雖未能彰往示來庶
一方之錢穀戶口阨塞險要風俗人物以及山川
道里之遠近災祥時政之得失可籍是無憾文獻
之不足也乎是為序

舊序

羅英

畢志係明萬曆高少室韓襟江兩先生所纂後兩
罹火焰失傳即得一二故老所聞亦祇存十一於
千百可慨也康熙八年復貢例余授教清平禮謁

都勻郡伯於幕見明大中丞郭青螺先生所修黔
記中有畢志一卷即偕歸手抄以俟續輯五十餘
年未記事俾後起者有所考奈寄命黃口朝暮冬
烘無一日之暇今于二十六年秋奉督撫奏准畢
節改衛為縣部選方公來宰斯土命余纂校志乘
將前所抄者率同人分類採訪編輯成書雖掛漏
之病誠所不免而因方公徵獻考文得償余續輯
之夙願非余之大幸也哉

舊序

柯天健

竊惟事無關乎興廢者不必創於前義非切乎勸懲者亦無俟繼於後故貞淫並陳國風之訓也淑慝具載春秋之筆也知此可通其說於志志者記也史之支輔也三代有史而無志夏之禹貢周之周禮尚已司馬氏於紀傳年表之外若禮樂律曆及天官河渠志焉而名之以書至班氏始著為志後乃因之通都郡邑咸得舉焉此志之所由來也黔之有畢衛改為縣其原委前人已先我言之無煩復贅癸巳歲孟春余奉

天子命承乏茲土入境以來觀山川之巉澗風俗之淳
漓人物戶口之錯雜思一詳其巔末因數十年前
兵燹頻仍典籍殘缺悵焉莫考嗚呼蘭臺石室代
有傳人前者耳熟後者茫茫是誰之過歟爰與廣
文張君慨焉作興取前任方公舊稿孜孜校讐庶
合邑之土地山川人民物產戶口賦役古跡舊墟
政事風俗俱一一瞭如指掌絕無疑義但自愧才
疎學淺且蒞任未久不敢妄有增損貽譏識者惟
願後之同志再加詳核補其不逮俾斯集得成全